

Uunga siunnersuut: Imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaata allanngortinneqarnissaa pillugu Inatsisartut inatsisaat

(Aningaasaqarnermut Nunanilu avannarlerni Suleqatigiinnermut Naalakkersuisoq)

Akissuteqaat

(Aningaasaqarnermut Nunanilu avannarlerni Suleqatigiinnermut Naalakkersuisoq)

Aappassaaneerinnineq

Inatsisissatut siunnersuutip suliarineqarneranut atatillugu Aningaasaqarnermut Akileraartarnermullu Ataatsimiititaliap sukumiisumik suliaqarnera Naalakkersuisut sinnerlugit qujassutigaa.

Ataatsimiititaliap isumaqatigiittup siunnersuut akuerineqartussatut inassutigaa Naalakkersuisunit nuannaarutigalugu maluginiarneqarpoq.

Ataatsimiititaliap qinnuteqarneratigut Naalakkersuisut aappassaaneerinissamat allannguutissatut siunnersuummik saqqummiussipput. Allannguutissatut siunnersuutip nassatarisaanik mineralvandinik, sodavandinik, limonadenik allanillu kulisyremik akoqartunik, ethanolimik akoqanngitsunik imeruersaatinik aningaasarsiutigalugu sanasarneq pillugu malittarisassanik unioqquitsineq ethanolimik akulimmikk imeruersaatinik nammineq inuussutissarsiutigaluguluunniit sanasarneq assigalugu inatsimmi pineqaatissiisarnermut aalajangersakkanut ilaatinneqalissaaq.

Aammattaaq siunnersuummi § 19, imm. 1, nr. 2 naapertorlugu oqaasertat ”imaluunniit unioqquitseriaraluartoq” peerneqassapput, tassa inatsimmi aalajangersakkanik unioqquitseriaraluarneq Kalaallit Nunaanni Pinerluttulerinermi Inatsimmi unioqquitseriaraluarneq pillugu aalajangersakkani ilaatinneqariissamat.

Taama oqaaseqarlunga siunnersuut saqqummiunneqartoq Naalakkersuisut allannguutissatut siunnersuutaannut saqqummiunneqartumut peqatigitillugu pingajussaaniigassanngortinneqassasoq Naalakkersuisut sinnerlugit inassutigaa.